

四庫全書

經部

欽定四庫全書

經部

春秋大全卷二十八

詳校官監察御史_臣薛時

給事中_臣溫常綬覆勘

總校官知縣_臣楊懋珩

校對官中書_臣郭晉

謄錄監生_臣陳全

欽定四庫全書

春秋大全卷二十八

明 胡廣等 撰

襄公下

己丑王二十有七年晉平十二齊景二衛獻三十一
蔡景四十六鄭簡二十曹武九

陳哀二十三杞文四宋平三十秦
景三十一楚康十四吳餘祭二

春

附錄左傳春齊梁帶使諸喪邑者具車徒以受地必
周使烏餘具車徒以受封烏餘以其衆出使諸

侯偽效鳥餘之封者而遂執之盡獲之皆取其邑而歸諸侯諸侯是以睦於晉

齊侯使慶封來聘

左傳齊慶封來聘其車美孟孫謂叔孫曰慶季之車不亦美乎叔孫曰豹聞之服美不稱必以惡終美車何為叔孫與慶封食不敬為賦相鼠亦不知也杜氏曰景公即位通嗣君也汪氏曰自齊人滕伯姬僑如逆婦姜二國不通好者三十年今景公不事侵伐先遣貴卿聘于魯亦云賢矣高氏曰夫鄭不仇楚而齊魯釋怨此宋之盟所以輯也廬陵李氏曰齊聘魯五止於此

夏叔孫豹會晉趙武楚屈建蔡公孫歸生衛石惡陳孔奐鄭良宵許人曹人于宋

屈居勿反與公作瑗後同晉楚始同主盟左傳宋向戌
善於趙文子又善於令尹子木欲弭諸侯之兵以為名
如晉告趙孟趙孟謀於諸大夫韓宣子曰兵民之殘也
財用之蠹小國之大菑也將或弭之雖曰不可必將許
之弗許楚將許之以召諸侯則我失為盟主矣晉人許
之如齊齊人難之陳文子曰晉楚許之我焉得已且人
曰弭兵而我弗許則固攜吾民矣將焉用之齊人許之
告于秦秦亦許之皆告於小國為會于宋五月甲辰晉
趙武至於宋丙午鄭良霄至六月丁未朔宋人享趙
文子叔向為介司馬置折俎禮也仲尼使舉是禮也以
為多文辭戊申叔孫豹齊慶封陳須無衛石惡至甲寅
晉荀盈從趙武至丙辰邾悼公至壬戌楚公子黑肱先
至成言於晉丁卯宋向戌如陳從子木成言於楚戊辰
滕成公至子木謂向戌請晉楚之從交相見也庚午向
戌復於趙孟趙孟曰晉楚齊秦匹也晉之不能於齊猶
楚之不能於秦也楚君若能使秦君辱於敝邑寡君敢

不固請於齊壬申左師復言于子木子木使驛謁諸王
王曰釋齊秦他國請相見也秋七月戊寅左師至是夜
也趙孟及子皙盟以齊言庚辰子木至自陳陳孔奐蔡
公孫歸生至曹許之大夫皆至以藩為軍晉楚各處其
偏伯夙謂趙孟曰楚氛甚惡懼難趙孟曰吾左還入於
宋若我何杜氏曰齊秦不交相見邦滕為私屬皆不與
盟宋為主人地於宋則與盟可知故經唯序九國大夫
孫氏曰隱桓之際天子失道諸侯擅權宣成之間諸侯
僭命大夫專國至宋之會諸侯日微天下之政中國之
事皆大夫專持之故二十九年城杞三十年會澶淵昭
元年會號諸侯莫有見者高氏曰此會楚意也楚人患
吳而結諸夏也諸侯之大夫不詳其故始徇其弭兵之
名遂會于宋而與之盟自是內外之分莫辨而諸國僥
首兩事晉楚桓文數十年之功業一朝而壞之百姓雖
暫免於兵革之苦而天下之大勢遂大潰而不可收拾
矣彼向戌者又豈足知天下之大計哉陳氏曰此晉楚

初同主諸侯盟也晉楚嘗盟矣會于瑣澤之歲宋華元克合晉楚之成士燮會公子罷盟于宋西門之外不書猶曰特相盟也兩國之好而非天下之大變也以諸侯分為晉楚之從而交相見也於是始則是南北二伯也天下之大變也於溴梁而無君臣之分於宋而無內外之辨昭定哀之春秋將以終於吳越焉爾矣汪氏曰楚先軟而春秋先晉者尊中國而抑蠻荆也荆楚之同主夏盟皆宋為之也宋襄圖伯始進楚人于鹿上之盟既而孟之會楚書爵而與宋公並序于諸侯之上二伯之端兆於此矣故遂有孟之執泓之敗而宋不能霸華元合晉楚之成盟于宋西門之外爭霸之業復啟於此故鄢陵楚子敗績而鄭終從楚今也向戌為成使晉楚之從交相見而兩霸之勢遂成於此故于申之會晉遂退縮不復主諸侯而宋向戌目獻禮於楚子由是知荆楚之爭雄於中國皆宋為之也

衛殺其大夫甯喜

左傳甯喜專公患之公孫免餘請殺之公曰微甯子不及此吾與之言矣事未可知祇成惡名止也對曰臣殺之君勿與知乃與公孫無地公孫臣謀使攻甯氏弗克皆死公曰臣也無罪父子死余矣夏免餘復攻甯氏殺甯喜及右宰穀尸諸朝石惡將會宋之盟受命而出衣其尸枕之股而哭之欲斂以亡懼不免且曰受命矣乃行穀梁傳稱國以殺罪累上也甯喜弑君其以累上之辭言之何也嘗為大夫與之涉公事矣甯喜由君弑君而不以弑君之罪罪之者惡獻公也

甯喜既坐弑君之罪矣不以討賊之詞何也初衛侯使與喜言苟反政由甯氏祭則寡人甯氏納之衛侯

復國患甯喜之專也公孫免餘請殺之曰微甯子不及此吾與之言矣對曰臣殺之君勿與知乃攻甯氏殺喜尸諸朝子鮮曰逐我者出納我者死賞罰無章

何以勸沮君失其信而國無刑不亦難乎故稱國以

殺而不去其官

范氏曰不言喜之非罪而死則獻公之惡不彰孫氏曰甯喜不以討賊辭

書者獻公殺之不以其罪也高郵孫氏曰喜弑剽而納衍衍反國而復用之既而以其私殺之喜雖有罪而衛侯殺之不以其罪矣昔里克殺奚齊而立夷吾夷吾殺之二君之殺其大夫皆以其私里克甯喜之見殺皆不以其罪故春秋皆曰殺其大夫家氏曰剽篡君者也他人可殺而甯喜嘗事之以為君不得殺

也故書弑以正其罪喜弑君者也他人可殺而衛獻因之以入不得殺也故稱國以殺不削其官

衛侯之弟鱄出奔晉

左傳子鮮曰逐我者出納我者死賞罰無章何以沮勸君失其信而國無刑不亦難乎且鱄實使之遂出奔晉公使止之不可及河又使止之止使者而盟於河託于木門不鄉衛國而坐木門大夫勸之仕不可曰仕而廢其事罪也從之昭吾所以出也將誰愬乎吾不可以立於人之朝矣終身不仕公喪之如稅服終身公與免餘邑六十辭曰唯卿備百邑臣六十矣下有上祿亂也臣弗敢問且甯子唯多邑故死臣懼死之連及也公固與之受其半以為少師公使為卿辭曰大叔儀不貳能贊大事君其命之乃使文子為卿公羊傳衛殺其大夫甯喜則衛侯之弟鱄曷為出奔晉為殺甯喜出奔也曷為為殺甯喜出奔衛甯殖與孫林父逐衛侯而立公孫剽

甯殖病將死謂喜曰黜公者非吾意也孫氏為之我即死女能固納公乎喜曰諾甯殖死喜立為大夫使人謂獻公曰黜公者非甯氏也孫氏為之吾欲納公何如獻公曰子苟欲納我吾請與子盟喜曰無所用盟請使公子鱣約之獻公謂公子鱣曰甯氏將納我吾欲與之盟其言曰無所用盟請使公子鱣約之子固為我與之約矣公子鱣辭曰夫負羈繫執鈇鑕從君東西南北則是臣僕庶孽之事也若夫約言為信則非臣僕庶孽之所敢與也獻公怒曰黜我者非甯氏與孫氏凡在爾公子鱣不得已而與之約已約歸至殺甯喜公子鱣挈其妻子而去之將濟于河攜其妻子而與之盟曰苟有履衛地食衛粟者昧矰彼視穀梁傳鱣喜之徒也鱣之為喜之徒何也已雖急納其兄與人之臣謀弑其君是亦弑君者也鱣其曰弟何也鱣有是信者君賂不入乎喜而穀喜是君不直乎喜也故出奔晉織絢邯鄲終身不言衛鱣之去合乎春秋

衛侯之入使鱄與甯喜約言既殺甯喜鱄病失言遂出奔晉託於木門不鄉衛國而坐木門大夫勸之仕不可曰仕而廢其事罪也從之昭吾所以出也吾不

可以立於人之朝矣終身不仕其稱弟罪衛侯也

氏家

曰鱄始衛其君兄之命以與甯喜約固許之以專衛國之政今以其專而殺之在衛獻為食言鱄自以失信於死者逃其兄而去之夫鱄衛獻之母弟也獻非鱄不得反國今甫奠于位而不能安鱄之身獻之不友甚矣書衛侯之弟譏不友也穀梁子曰鱄之去合乎春秋

范氏曰喜雖弑

君本與鱄約納獻公公由喜得入已與喜以君臣從事矣春秋撥亂重盟約今獻公背之而殺忠與已者

是獻公惡而難親也。鱣懼禍將及，君子見幾而作，不俟終日。鱣之去衛，其心合于春秋。劉氏曰：衛侯忌小忿，以誅有功，損大信，以疑至親，使鱣至于去國逃死。者，無人君之道故也。當此之時，鱣以全身不罹於惡名，為智；以毋使其兄有誅弟之惡，為義；以不翹世以自潔為忠；以不仕而能矯國之失為廉。可謂重己者，是乃君子之所貴也。

秋七月辛巳，豹及諸侯之大夫盟于宋。

左傳：辛巳，將盟于宋西門之外。楚人衷甲，伯州犂曰：「合諸侯之師，以為不信，無乃不可乎？」夫諸侯望信於楚，是以來服。若不信，是棄其所以服諸侯也。固請釋甲。子木曰：「晉楚無信久矣，事利而已。苟得志焉，焉用有信？」大宰退告人曰：「令尹將死矣，不及三年求逞志而棄信，志將逞乎？」志以發言，言以出信，信以立志，參以定之，信亡何

以及三趙孟患楚衷甲以告叔向叔向曰何害也匹夫一為不信猶不可單斃其死若合諸侯之卿以為不信必不捷矣食言者不病非子之患也夫以信召人而以僭濟之必莫之與也安能害我且吾因宋以守病則夫能致死與宋致死雖倍楚可也子何懼焉又不及是曰弭兵以召諸侯而稱兵以害我吾庸多矣非所患也季武子使謂叔孫以公命曰視邾滕既而齊人請邾宋人請滕皆不與盟叔孫曰邾滕人之私也我列國也何故視之宋衛吾匹也乃盟故不書其族言違命也晉楚爭先晉人曰晉固為諸侯盟主未有先晉者也楚人曰子言晉楚匹也若晉常先是楚弱也且晉楚狎主諸侯之盟也久矣豈專在晉叔向謂趙孟曰諸侯歸晉之德只非歸其尸盟也子務德無爭先且諸侯盟小國固必有尸盟者楚為晉細不亦可乎乃先楚人書先晉晉有信也壬午宋公兼享晉楚之大夫趙孟為客子木與之言弗能對使叔向待言焉子木亦不能對也乙酉宋公及

諸侯之大夫盟于蒙門之外子木問于趙孟曰范武子之德何如對曰夫子之家事治言於晉國無隱情其祝史陳信于鬼神無愧辭子木歸以語王王曰尚矣哉能歆神人宜其光輔五君以為盟主也子木又語王曰宜晉之伯也有叔向以佐其卿楚無以當之不可與爭晉荀盈遂如楚蒞盟鄭伯享趙孟于垂隴子展伯有子西子產子大叔二子石從趙孟曰七子從君以寵武也請皆賦以卒君貺武亦以觀七子之志子展賦草蟲趙孟曰善哉民之主也抑武也不足以當之伯有賦鷦鷯之賁趙孟曰牀第之言不踰閭况在野乎非使人之所得聞也子西賦黍苗之四章趙孟曰寡君在武何能焉子產賦隰桑趙孟曰武請受其卒章子大叔賦野有蔓草趙孟曰吾子之惠也印段賦蟋蟀趙孟曰善哉保家之主也吾有望矣公孫段賦桑扈趙孟曰匪交匪敖福將焉往若保是言也欲辭福祿得乎卒享文子告叔向曰伯有將為戮矣詩以言志志誣其上而公怨之以為賓

榮其能久乎幸而後亡叔向曰然已侈所謂不及五稔者夫子之謂矣文子曰其餘皆數世之主也子展其後亡者也在上不忘降印氏其次也樂而不荒樂以安民不淫以使之後亡不亦可乎宋左師請賞曰請免死之邑公與之邑六十以示子罕子罕曰凡諸侯小國晉楚所以兵威之畏而後上下慈和慈和而後能安靖其國家以事大國所以存也無威則驕驕則亂生亂生必滅所以亡也天生五材民並用之廢一不可誰能去兵兵之設久矣所以威不軌而昭文德也聖人以興亂人以廢廢興存亡昏明之術皆兵之由也而子求去之不亦誣乎以誣道蔽諸侯罪莫大焉縱無大討而又求賞無厭之甚也削而投之左師辭邑向氏欲攻司成左師曰我將亡夫子存我德莫大焉又可攻乎君子曰彼已之子邦之司直樂喜之謂乎何以恤我其收之向戌之謂乎公羊傳曷為再言豹殆諸侯也曷為殆諸侯為衛石惡在是也曰惡人之徒在是矣穀梁傳溴梁之會諸

侯在而不曰諸侯之大夫大夫不臣也晉趙武恥之豹云者恭也諸侯不在而曰諸侯之大夫大夫臣也其臣恭也晉趙武為之會也

此一地也曷為再言宋書之重詞之複其中必有大

美惡焉宋之盟合左師欲弭諸侯之兵以為名而楚

屈建請晉楚之從交相見

呂氏曰內外之分自此不復辨矣

自是中

國諸侯南向而朝楚

永嘉呂氏曰魯自僖公以來雖貳於楚而未嘗一跡其國自盟

宋之後明年如楚逾年乃至春秋備書之以見中國諸侯事楚猶事晉矣向也不過陳蔡鄭從楚無他近楚之國也今也魯宋皆均事楚矣

及申之會蠻荒之君篡弑之賊大

合十有一國之衆而用齊桓名陵之禮宋左師鄭子
產皆獻禮焉宋世子佐以後至遂辭而不見伐吳滅
賴無敢違者聖人至是哀人倫之滅傷中國之衰而

其事自宋之盟始也

陳氏曰自宋以來晉不專主盟矣號之盟讀舊書加于牲上而

已至鄆陵則齊主諸侯至臯鼫則魯及諸侯晉之不足以至夏盟自宋始宋之盟趙武之偷也孔子曰庭燎之百由齊桓公始也大夫之奏肆夏由趙文子始也是王伯之所以興衰也於是晉楚爭先乃先楚人則其書先晉何春秋不以蠻荒先中國也故會盟同地而再言宋者貶之

也

汪氏曰事之美者屢言之以著其美事之惡者亦屢言之以著其惡是故美惡不嫌同辭

或者

乃以宋之盟中國不出楚人不入玉帛之使交乎天

下以尊周室為晉趙武楚屈建之力而善此盟也

劉氏

曰宋之會弭諸侯之兵百姓免兵革之患其說誤矣

十有餘年趙武屈建之力可以當齊桓

孫氏曰溴梁之會諸侯會而曰大夫盟者大夫無諸侯也此盟諸侯不在而曰豹及諸侯之大夫盟于宋者不與大夫無諸侯也豹不氏前見也汪氏曰說者稱于宋弭兵蓋是時晉楚皆怠於出師是以偶有六七年之安靖然楚人衷甲苟非伯州犁之言則趙孟為宋襄之執矣况魯帥師而取鄆晉帥師而敗狄兵亦未嘗戢也楚圍既讀舊書未幾篡國大合諸侯伐吳滅賴安在其能弭兵也哉家氏曰楚人雖強不過南服之雄耳晉雖中衰霸主之餘威尚在也今諸侯來集楚人遽求為長趙武畏其盛兵衷甲苟求無事

遂長楚人春秋為中國惜故先晉况會盟于中國之境而南蠻長之無內外之分亂壇坫之常啟戎心而名後患趙武叔向無以辭其責也廬陵李氏曰楚之爭伯常始于宋而楚之分伯亦成於宋其爭伯也圍宋盟宋矣然僖二十七年宋之盟無嫌於宋與春秋猶恕宋也至宣十五年宋楚為平已開天下南北之變矣故以貶詞書未幾而成十二年華元克合晉楚之成於是晉楚分伯之幾啟於宋矣春秋諱而不書蓋有以也至是向戌以弭兵為名驅中國之諸侯而交見於楚廷宋其春秋之罪人歟春秋兩書宋為地主以首禍罪宋也○劉氏曰此乃一事再見者前目而後凡耳何謂殆諸侯乎且石惡名惡耳行未必惡也公羊之說非也稱諸侯者常文耳不稱諸侯者變文也又豹不氏乃一事再見卒名之例不以是為恭也穀梁之說亦非也蔡許失位左氏貶之今魯欲自同人之私失位甚矣且命出季氏而曰不可違何哉

左氏違命不書族之說尤非也

附錄

左傳齊崔杼生成及疆而寡娶東郭姜生明東郭姜以孤入曰棠無咎與東郭偃相崔氏崔成

有疾而廢之而立明成請老于崔崔子許之偃與無咎弗子曰崔宗邑也必在宗主成與疆怒將殺之告慶封曰夫子之身亦子所知也唯無咎與偃是從父兄莫得進矣大恐害夫子敢以告慶封曰子姑退吾圖之告盧蒲癸盧蒲癸曰彼君之醜也天或者將棄彼矣彼實家亂子何病焉崔之薄慶之厚也他日又告慶封曰苟利夫子必去之難吾助女九月庚辰崔成崔疆殺東郭偃棠無咎于崔氏之朝崔子怒而出其衆皆逃求入使駕弗得使圉人駕寺人御而出且曰崔氏有福止余猶可遂見慶封慶封曰崔慶一也是何敢然請為子討之使盧蒲癸帥甲以攻崔氏崔氏堞其宮而守之弗克使國人助之遂滅崔氏殺成

與疆而盡俘其家其妻縕嬰復命於崔子且御而歸之至則無歸矣乃縕崔明夜辟諸大墓辛巳崔明來奔慶封當國○楚薳罷如晉涖盟晉侯享之將出賦既醉叔向曰薳氏之有後於楚國也宜哉承君命不忘敏子蕩將知政矣敏以事君必能養民政其焉往○崔氏之亂申鮮虞來奔僕賃於野以喪莊公冬楚人召之遂如楚為右尹

冬十有二月乙亥朔日有食之

左傳十一月乙亥朔日有食之辰在申司歷過也再失閏矣杜氏曰周十一月今九月斗當建成而在申故知再失閏也文十一年三月甲子至今年七十一歲應有二十六閏今長歷推之得二十四閏通計少再閏○啖氏曰按經言十二月傳言十一月依經當云三失閏進退不同不可得而考劉氏曰歷家之術求閏餘易求交

朔難今司歷能正交
朔反不能正閏乎

丙靈王二十
辰七年崩
二十有八年
晉平十三齊景三衛獻三十
二蔡景四十七鄭簡二十一

曹武十陳哀二十四杞文五宋平三十
二秦景三十楚康十五卒吳餘祭三

春無冰

左傳梓慎曰今茲宋鄭其饑乎歲在星紀而淫於玄枵
以有時菑陰不堪陽蛇乘龍龍宋鄭之星也宋鄭必饑
玄枵虛中也枵耗名也土虛而民耗不饑何為孫氏曰
時燠也汪氏曰是時襄公昏庸三家專政明年季武子
取卞而襄公幾不得入
其紀綱縱弛可知矣

附錄

左傳夏齊侯陳侯蔡侯北燕伯杞伯胡子沈子
白狄朝于晉宋之盟故也齊侯將行慶封曰我

不與盟何為於晉陳文子曰先事後賄禮也小事大未獲事焉從之如志禮也雖不與盟敢叛晉乎重丘之盟未可忘也子其勸行

夏衛石惡出奔晉

左傳衛人討甯氏之黨故石惡出奔晉衛人立其從子圉以守石氏之祀禮也

邾子來朝

左傳邾悼公來朝時事也高氏曰邾自晉執其君魯取其田益微弱矣至是悼公來朝

秋八月大雩

左傳旱也高氏曰春無冰秋旱此皆人事所召而僭用大禮以祈之不亦悖乎

附錄

左傳蔡侯歸自晉入于鄭鄭伯享之不敬子產曰蔡侯其不免乎日其過此也君使子展廷勞

於東門之外而傲吾曰猶將更之今還受享而惰乃其心也君小國事大國而情傲以為已心將得死乎若不免必由其子其為君也淫而不父僑聞之如是者恒有子禍

仲孫羯如晉

左傳孟孝伯如晉告將為宋之盟故如楚也

附錄

左傳蔡侯之如晉也鄭伯使游吉如楚及漢楚人還之曰宋之盟君實親辱今吾子來寡君謂

吾子姑還吾將使驛奔問諸晉而以告子大叔曰宋之盟君命將利小國而亦使安定其社稷鎮撫其民人以禮承天之休此君之憲令而小國之望也寡君是故使吉奉其皮幣以歲之不易聘於下執事今執

事有命曰女何與政令之有必使而君棄而封守跋涉山川蒙犯霜露以逞君心小國將君是望敢不唯命是聽無乃非盟載之言以闕君德而執事有不利焉小國是懼不然其何勞之敢憚子大叔歸復命告子展曰楚子將死矣不脩其政德而貪昧於諸侯以逞其願欲久得乎周易有之在復三三之願三三曰迷復凶其楚子之謂乎欲復其願而棄其本復歸無所是謂迷復能無凶乎君其往矣送葬而歸以快楚心楚不幾十年未能恤諸侯也吾乃休吾民矣裨竈曰今茲周王及楚子皆將死歲棄其次而旅於明年之次以害鳥帑周楚惡之○九月鄭游吉如晉告將朝于楚以從宋之盟子產相鄭伯以如楚舍不為壇外僕言曰昔先大夫相先君適四國未嘗不為壇自是至今亦皆循之今子草舍無乃不可乎子產曰大適小則為壇小適大苟舍而已焉用壇僑聞之大適小有五美宥其罪戾赦其過失救其舊患賞其德刑

教其不及小國不困懷服如歸是故作壇以昭其功
宣告後人無怠於德小適大有五惡說其罪戾請其
不足行其政事共其職貢從其時命不然則重其幣
帛以賀其福而弔其凶皆小國之禍也焉用作壇以
昭其禍所以告子
孫無昭禍焉可也

冬齊慶封來奔

左傳齊慶封好田而嗜酒與慶舍政則以其內實遷于
盧蒲嬖氏易內而飲酒數日國遷朝焉使諸亡人得賊
者以告而反之故反盧蒲癸癸臣子之有寵妻之慶舍
之士謂盧蒲癸曰男女辨姓子不辟宗何也曰宗不余
辟余獨焉辟之賦詩斷章余取所求焉惡識宗癸言王
何而反之二人皆嬖使執寢戈而先後之公膳日雙雞
饗人竊更之以驚御者知之則去其肉而以其滑饋子
雅子尾怒慶封告盧蒲嬖盧蒲嬖曰譬之如禽獸吾寢

處之矣使析歸父告晏平仲平仲曰嬰之衆不足用也知無能謀也言弗敢出有盟可也子家曰子之言云又焉用盟告北郭子車子車曰人各有以事君非佐之所能也陳文子謂桓子曰禍將作矣吾其何得對曰得慶氏之木百車于莊文子曰可慎守也已盧蒲癸王何卜攻慶氏示子之兆曰或卜攻讐敢獻其兆子之曰克見血冬十月慶封田于萊陳無宇從丙辰文子使召之請曰無宇之母疾病請歸慶季卜之示之兆曰死奉龜而泣乃使歸慶嗣聞之曰禍將作矣謂子家速歸禍作必於嘗歸猶可及也子家弗聽亦無悛志子息曰亡矣幸而獲在吳越陳無宇濟水而戕舟發梁盧蒲姜謂癸曰有事而不告我必不捷矣癸告之姜曰夫子愼莫之止將不出我請止之癸曰諾十一月乙亥嘗于太公之廟慶舍泣事盧蒲姜告之且止之弗聽曰誰敢者遂如公麻嬰為尸慶姜為上獻盧蒲癸王何執寢戈慶氏以其甲環公宮陳氏鮑氏之圉人為優慶氏之馬善驚士皆

釋甲束馬而飲酒且觀優至於魚里藥高陳鮑之徒介
慶氏之甲子尾抽桶擊扉三廬蒲癸自後刺子之王何
以戈擊之解其左肩猶援廟桶動於薨以俎壺投殺人
而後死遂殺慶繩麻嬰公懼鮑國曰羣臣為君故也陳
須無以公歸稅服而如內官慶封歸遇告亂者丁亥伐
西門不克還伐北門克之入伐內宮弗克反陳于嶽請
戰弗許遂來奔獻車於季武子美澤可以鑑展莊叔見
之曰車甚澤人必瘁宜其亡也叔孫穆子食慶封慶封
汜祭穆子不說使工為之誦茅鴟亦不知既而齊人來
讓奔吳吳勾餘子之朱方聚其族焉而居之富於其舊
子服惠伯謂叔孫曰天殆富淫人慶封又富矣穆子曰
善人富謂之賞淫人富謂之殃天其殃之也其將聚而
殲旃家氏曰廬蒲癸王何莊公之倖臣也殺慶舍逐慶
封而戮崔杼莊之弑也倖臣與之俱死者十人今為之
討賊亦倖臣也身為國君以倖臣為羽翼莊固可鄙矣
而卿大夫無能為君討賊復讎者而幸臣乃能之亦卿

大夫之恥也汪氏曰齊殺崔杼不書皆非以賊討也宋人以賂請萬於陳而醢之且不書殺况杼以家亂而自

斃乎

附錄

左傳癸巳天王崩未來赴亦未書禮也○崔氏之亂喪羣公子故鉏在魯叔孫還在燕賈在句

瀆之丘及慶氏亡皆召之具其器用而反其邑焉與晏子邛殿其鄙六十弗受子尾曰富人之所欲也何獨弗欲對曰慶氏之邑足欲故亡吾邑不足欲也益之以邛殿乃足欲足欲亡無日矣在外不得宰吾一邑不受邛殿非惡富也恐失富也且夫富如布帛之有幅焉為之制度使無遷也夫民生厚而用利於是乎正德以幅之使無黜嫚謂之幅利利過則為敝吾不敢貪多所謂幅也與北郭佐邑六十受之與子雅邑辭多受少與子尾邑受而稍致之公以為忠故有寵釋盧蒲癸于北竟求崔杼之尸將戮之不得叔孫

穆子曰必得之武王有亂十人崔杼其有乎不十人
不足以葬既崔氏之臣曰與我其拱璧吾獻其柩於
是得之十二月乙亥齊人遷莊公殯于大寢以
其棺尸崔杼於市國人猶知之皆曰崔子也

十有一月公如楚

諸夏之君始旅見於楚左傳為宋之盟故公及宋公陳
侯鄭伯許男如楚公過鄭鄭伯不在伯有廷勞於黃崖
不敬穆叔曰伯有無戾於鄭鄭必有大咎敬民之主也
而棄之何以承守鄭人不討必受其辜濟澤之阿行潦
之蘋藻寘諸宗室季蘭尸之敬也敬可棄乎孫氏曰桓
文既沒蠻荆日熾中國日微故公遠朝強楚也陳氏曰
舉魯以見其餘也是故書公朝王所見王業之衰書公
如楚見霸業之衰凡舉魯以見其餘者則天下之辭也
臨川吳氏曰齊晉霸國也以魯朝之猶云可也楚蠻荒
也初亦小弱後以吞滅小國憑陵中夏而浸强大晉霸

既衰不能與伉魯之朝楚非得已也屈禮義之望國朝崛起之蠻荆儻書曰朝辱莫甚焉止書曰如猶為諱其恥也汪氏曰僖十八年鄭文公始朝于楚二十二年鄭伯又如楚二十四年宋成公亦如楚自是而後鄭伯屢朝于楚而陳許諸君朝楚傳亦間見蓋至于今年而中國之諸侯旅朝于楚以事天子之禮事之矣迨昭九年而諸侯之大夫亦旅見于楚矣迄哀之四年而晉亦京師楚矣世變至是聖人蓋傷之甚矣

十有二月甲寅天王崩

左傳王人來告喪閭崩日以甲寅告故書之以徵過也汪氏曰不書葬諸侯不會也

乙未楚子昭卒

左傳及漢楚康王卒公欲反叔仲昭伯曰我楚國之為豈為一人行也子服惠伯曰君子有遠慮小人從邇饑

寒之不恤誰違其後不如姑歸也叔孫穆子曰叔仲子專之矣子服子始學者也榮成伯曰遠圖者忠也公遂行宋向戌曰我一人之為非為楚也饑寒之不恤誰能恤楚姑歸而息民待其立君而為之備宋公遂反

甲寅天王崩乙未楚子昭卒相距四十二日則閏月之驗也然不以閏書見喪服之不數閏也齊景公葬

書閏月明殺恩之非禮也

呂氏曰此明閏月之驗然不書閏者承前月而受其

餘日故書閏月之日繫前月之下史策常體又有定例故不必每月書傳此范甯之說也杜預以十二月無乙未日誤孫穎達以為甲寅乙未不得同月是皆不知閏月之日繫前月之下耳

附錄

左傳楚屈建卒趙文子喪之如同盟禮也

丁景王
巳元年

二十有九年

晉平十四齊景四衛獻三十三蔡景四十八鄭簡二十二曹武十一

陳哀二十五杞文六宋平三十二秦景三十三楚郊敖麋元年吳餘祭四弒

春王正月公在楚

左傳釋不朝正于廟也楚人使公親譏公患之穆叔曰被宿而襚則布幣也乃使巫以桃茢先被殯楚人弗禁既而悔之公羊傳何言乎公在楚正月以存君也穀梁傳閔公也

歲之首月公在他國者有矣

汪氏曰莊二十二年冬公如齊二十三年春至

自齊文三年冬公如晉四年春至自晉十三年冬公如晉十四年正月至自晉成十年七月公如晉十一年三月至自晉襄四年冬公如晉五年春至自晉十二年冬公如晉十三年春至自晉昭十五年冬公如

晉十六年夏至自晉此獨書公在楚者外為夷狄所制以俟其

葬而不得歸

唐陳氏曰如晉而不朝正者常也故不書楚外夷也如楚不朝正者非常也故

書孫氏曰公在中國猶可在夷狄則甚矣公留于楚者七月故詳而錄之薛氏曰在楚之書也危其在中國之外也內為強臣所逼欲擅其國而不敢入

劉氏曰昭公去國以

乾侯寄季氏居君之位攝君之祭魯之一民非公之有聖人嫌于國無公公無國也故因正月書公在以正之今襄公亦去其國季孫亦叛於內居君之位攝君之祭其與乾侯也同同則其文等矣故有公則無所復存存公則失國可知矣坤之剝曰龍戰于野夫嫌於無陽而後稱龍猶嫌於無君而後存公安可不察也故特書所在以存君也

何氏曰襄公久在夷狄危錄之范氏曰閔公為楚所

制故存錄廬陵李氏曰左氏疏曰僖十六年冬會淮
宣七年冬會黑壤成十年秋如晉襄十二年冬如晉
皆以次年至此等正月公皆不在其數多矣惟此一
年書者釋例曰凡公之行國之守臣每月亦以公不
朝之故告於廟每日必告而特于正月釋之者蓋歲
之正也月之正也日之正也三始之正嘉禮所重人
理所以自新故特顯以通他月也惟書此年者
如楚既非常公又踰年故發此一例以示法也按左

氏楚人使公親禴夏四月送楚子葬至于西門之外

還及方城

杜氏曰方城山在南陽葉縣南

季武子取卞以自封

杜氏曰魯

國卞縣

使公冶告曰聞守卞者將叛臣帥師徒以討既

得之矣公曰欲而言叛祇見疏也吾不可以入矣將

適諸侯有賦式微者乃歸故特於歲首朝正之時而

書曰公在楚使後世臣子戴天履地視君父之危且

困者必有天威不違顏咫尺

見左傳傳公九年

食坐見於羹

墻之意

後漢書李固傳昔堯殂之後舜仰慕三年坐則見堯於墻食則覩堯於羹

而不以

頃刻忘也

董子繁露曰公在楚臣子思君無一日無君之意

此義一行豈敢

有顧其身與妻子與其家而不恤國朋附權臣以圖

富貴而背其君者乎

高氏曰君在齊晉多矣闕朝王之禮亦不少矣但書公如齊如

晉而義自見也今書公在楚則聖人之旨深矣二十八年十一月公如楚十二月甲寅天王崩乙未楚子

昭卒公不篤君臣之義以奔天王之喪而徇夷狄之強以俟楚子之葬久留于楚迨夏乃歸故聖人特於朝正之時書公所在與昭公失國在乾侯同且以責季氏之無君也家氏曰公在乾侯以內外言也公在楚則去中國之辭也向戌售其邪說屈列國而伸蠻荒俾中國諸侯相率而朝于楚公復為楚人所侮辱久乃得歸春秋閔中國諸侯之為蠻荒屈故於歲首書公在楚外楚也夫楚朝於中國理之常也中國旅朝于楚反常也春秋於事之反常者每變例而特書此類是也○啖氏曰左傳云釋不朝正于廟也按前後正月公不在例不書何獨於此釋不朝正乎趙氏曰凡君在外不應都廢告朔之禮當是大臣攝行矣

附錄

左傳二月癸卯齊人葬莊公于北郭○夏四月葬楚康王公及陳侯鄭伯許男送葬至于西門

之外諸侯之大夫皆至于墓楚郊敖即位王子圍為令尹鄭行人子羽曰是謂不宜必代之昌松柏之下

其草
不殖

夏五月公至自楚

左傳公還及方城季武子取卞使公治問璽書追而與之曰聞守下者將叛臣帥徒以討之既得之矣敢告公治致使而退及舍而後聞取卞公曰欲之而言叛祇見疏也公謂公冶曰吾可以入乎對曰君實有國誰敢違君公與公冶冕服固辭強之而後受公欲無入榮成伯賦式微乃歸五月公至自楚公冶致其邑於季氏而終不入焉曰欺其君何必使余季孫見之則言季氏如他目不見則終不言季氏及疾聚其臣曰我死必無以冕服斂非德賞也且無使季氏葬我穀梁傳喜之也致君者殆其往而喜其反此致君之意義也范氏曰遠之璽國喜得全歸

庚午衛侯衎卒

附錄

左傳葬靈王鄭上卿有事子展使印段往伯有

王事靡盬不遑啟處東西南北誰敢寧處堅事晉楚以蕃王室也王事無曠何常之有遂使印段如周

閻弑吳子餘祭

左傳吳人伐越獲俘焉以為閻使守舟吳子餘祭觀舟閻以刀殺之公羊傳閻者何門人也刑人也刑人則曷為謂之閻刑人非其人也君子不近刑人近刑人則輕死之道也穀梁傳閻門者也寺人也不稱名姓閻不得齊於人不稱其君閻不得君其君也禮君不使無恥不近刑人不狎敵不邇怨賤人非所貴也貴人非所刑也刑人非所近也舉至賤而加之吳子吳子近刑人也閻殺吳子餘祭祭仇之也

穀梁子曰閹門者寺人也不稱名姓閹不得齊於人

不稱其君閹不得君其君也

沙隨程氏曰謂之弑蓋其君也不曰其君賤閹

也盜殺蔡侯申書殺閹書弑也以閹食庶人在官者之祿也

禮君不使無恥不近

刑人

禮記曲禮刑人不在君側祭統古者不使刑人守門

不狎敵不邇怨賤人

非所貴也貴人非所刑也刑人非所近也舉至賤而

加之吳子吳子近刑人也閹殺吳子餘祭仇之也左

氏以為伐越獲俘焉以為閹使守舟吳子觀舟閹以

刀弑之亦邇怨之失也

家氏曰春秋所以書言禍生於所忽也吳之諸君往往輕

以蹈禍遇卒于巢餘祭於闔僚死於
專諸春秋之書良以垂戒示後焉耳

附錄

左傳鄭子展卒子皮即位於是鄭饑而未及麥
民病子皮以子展之命餼國人粟戶一鍾是以

得鄭國之民故罕氏常掌國政以為上卿宋司城子
罕聞之曰鄰於善民之望也宋亦饑請於平公出公
粟以貸使大夫皆貸司城氏貸而不書為大夫之無
者貸宋無饑人叔向聞之曰鄭之罕宋之樂其後亡
者也二者其皆得國乎民之歸也施
而不得樂氏加焉其以宋升降乎

仲孫羯會晉荀盈齊高止宋華定衛世叔儀鄭公孫段
曹人莒人滕人薛人小邾人城杞

左傳晉平公杞出也故治杞六月知悼子合諸侯之大
夫以城杞孟孝伯會之鄭子大叔與伯石往子大叔見

大叔文子與之語文子曰甚乎其城杞也子大叔曰若
之何哉晉國不恤周宗之闕而夏肄是屏其棄諸姬亦
可知也已諳姬是棄其誰歸之吉也聞之棄同即異是
謂離德詩曰協比其鄰婚姻孔云晉不鄰矣其誰云之
齊高子容與宋司徒見知伯女齊相禮賓出司馬侯言
於知伯曰二子皆將不免子容專司徒侈皆亡家之主
也知伯曰何如對曰專則速及侈將以其力斃專則人
實斃之將及矣穀梁傳古者天子封諸侯其地足以容
其民其民足以滿城以自守也杞危而不能自
守故諸侯之大夫相帥以城之此變之正也

晉平公杞出也

杜氏曰平公母悼夫人乃杞孝公姊妹爾雅姊妹之子為出

故合

諸侯之大夫以城杞古之建國立家者必親九族

歐陽

氏曰父族四謂父之姓一族也父女昆弟適人有子
二族也已女昆弟適人有子三族也已女子適人有

子四族也母族三謂母之父一族也母之母二族也
母之昆弟三族也妻族二謂妻之父為一族妻之母
為一族
然有父族而後及母族有母族而後及妻族此

葛藟之詩所為次也

汪氏曰葛藟九族刺平王也周室道衰棄其九族焉一章曰謂

他人父二章曰謂他人母三章曰謂他人昆

晉主夏盟令行中國平公不

能修文襄悼公之業尊獎王室恤宗周之闕而夏肄

是屏

肆以二反陸氏曰斬而復生曰肆方言云枿餘也

輕棄諸姬可謂知本

乎平王惟不撫其民而遠屯戍于母家周人怨思焉

汪氏曰楊之水小序詩曰彼其之子不與我戍申申國平王之母家也

揚之水所以降

為國風不得列于雅也城杞之役亦不待貶絕而可

見矣

襄陵許氏曰齊桓城衛而諸侯歸心者桓公之志公天下也晉平城杞而人疾其役其志私也

動又不時能無攜手汪氏曰齊桓恤杞而城緣陵雖僭天子封國之權而得方伯救患之義事雖專而心則公也故春秋書曰諸侯城緣陵畧諸侯而不序且不曰城杞而曰城緣陵所以隱其專也晉平治杞而城之以大夫合天下之衆而修其私親之城郭初非救災卹患之舉心既私而事亦悖矣故春秋列序十有一國之大夫而曰城杞所以著其失也陳氏曰合十有一國諸侯之大夫而書城杞為悼夫人也合十三國諸侯之大夫于澶淵而書宋災故為共姬也衛甯喜弑其君孫林父以邑叛蔡世子般弑其父吳楚之大夫交聘於中國天下亦多故矣晉為盟主而區區於宋杞是晉之已細也晉之已細而後有執齊慶封

放陳招殺蔡侯般假討賊之義以盟諸夏如楚靈王者矣廬陵李氏曰僖公為成風伐邾而春秋不予以救患之義平公為悼夫人城杞而春秋不予以保小之仁則於公私之際審矣

晉侯使士鞅來聘

左傳范獻子來聘拜城杞也公享之展莊叔執幣射者三耦公臣不足取於家臣家臣展瑕展王父為一耦公臣公巫召伯仲顏莊叔為一耦鄆鼓父黨叔為一耦高氏曰謝城杞且使我歸杞田也廬陵李氏曰觀拜城杞之使即私情之不足以令諸侯可知矣

杞子來盟

左傳晉侯使司馬女叔侯來治杞田弗盡歸也晉悼夫人愠曰齊也取貨先君若有知也不尚取之公告叔侯

叔侯曰虞虢焦滑霍揚韓魏皆姬姓也晉是以大若非
侵小將何所取武獻以下兼國多矣誰得治之杞夏餘
也而即東夷魯周公之後也而睦於晉以杞封魯猶可
而何有焉魯之於晉也職貢不貳玩好時至公卿大夫
相繼於朝史不絕書府無虛月如是可矣何必齊魯以
肥杞且先君而有知也毋寧夫人而焉用老臣杞文公
來盟書曰子賤之也杜氏曰賤其用夷禮陳氏曰凡來
盟皆大夫也杞伯親之故賤之也杞雖稱子矣前乎此
夷儀之會稱伯後乎此卒復稱伯來盟特稱子見春秋
之貶諸侯也春秋之褒貶君大夫莫備於隱桓莊之世
寓王法也成襄而下舍杞子無削其爵者舍楚子虔無
生名之者經之變文也汪氏曰杞自莊二十七年稱伯
至僖二十三年二十七年兩稱子自後並稱伯惟此年
來盟稱子厥後終春秋稱伯義見桓二年高氏曰晉使
魯歸前所侵杞田故書杞子來盟於士鞅來聘之下廬
陵李氏曰此非前定之盟亦非因朝而盟蓋晉之治杞

田非出於公義魯之歸杞田未必出於誠心故杞子親來以要結之耳

吳子使札來聘

吳始聘吳始君臣並見左傳吳公子札來聘見叔孫穆子說之謂穆子曰子其不得死乎好善而不能擇人吾聞君子務在擇人吾子為魯宗卿而任其大政不慎舉何以堪之禍必及子請觀於周樂使工為之歌周南召南曰美哉始基之矣猶未也然勤而不怨矣為之歌邶鄘衛曰美哉淵乎憂而不困者也吾聞衛康叔武公之德如是是其衛風乎為之歌王曰美哉思而不懼其周之東乎為之歌鄭曰美哉其細已甚民弗堪也是其先亡乎為之歌齊曰美哉泱泱乎大風也哉表東海者其大公乎國未可量也為之歌豳曰美哉蕩乎樂而不淫其周公之東乎為之歌秦曰此之謂夏聲夫能夏則大之至也其周之舊乎為之歌魏曰美哉渢渢乎大而

婉險而易行以德輔此則明主也為之歌唐曰思深哉
其有陶唐氏之遺民乎不然何憂之遠也非令德之後
誰能若是為之歌陳曰國無主其能久乎自鄒以下無
譏焉為之歌小雅曰美哉思而不貳怨而不言其周德
之衰乎猶有先王之遺民焉為之歌大雅曰廣哉熙熙
乎曲而有直體其文王之德乎為之歌頌曰至矣哉直
而不倨曲而不屈邇而不偪遠而不攜遷而不淫復而
不厭哀而不愁樂而不荒用而不匱廣而不宣施而不
費取而不貪處而不底行而不流五聲和八風平節有
度守有序盛德之所同也見舞象箏南籥者曰美哉猶
有憾見舞大武者曰美哉周之盛也其若此乎見舞韶
護者曰聖人之弘也而猶有慙德聖人之難也見舞大
夏者曰美哉勤而不德非禹其誰能脩之見舞韶箏者
曰德至矣哉大矣如天之無不憐也如地之無不載也
雖甚盛德其蔑以加於此矣觀止矣若有他樂吾不敢
請已其出聘也通嗣君也故遂聘于齊說晏平仲謂之

曰子速納邑與政無邑與政乃免於難齊國之政將有所歸未獲所歸難未歇也故晏子因陳桓子以納政與邑是以免於藥高之難聘於鄭見子產如舊相識與之縞帶子產獻紵衣馬謂子產曰鄭之執政侈難將至矣政必及子子為政慎之以禮不然鄭國將敗適衛說蒧瑗史狗史鮪公子荊公叔發公子朝曰衛多君子未有患也自衛如晉將宿於戚聞鐘聲焉曰異哉吾聞之也辯而不德必加於戮夫子獲罪於君以此懼猶不足而又何樂夫子之在此也猶燕之巢於幕上君又在殯而可以樂乎遂去之文子聞之終身不聽琴瑟適晉說趙文子韓宣子魏獻子曰晉國其萃于三族乎說叔向將行謂叔向曰吾子勉之君侈而多良大夫皆富政將在家吾子好直必思自免於難公羊傳吳無君無大夫此何以有君有大夫賢季子也何賢乎季子讓國也其讓國奈何謁也餘祭也夷昧也與季子同母者四季子弱而才兄弟皆愛之同欲立之以為君謁曰今若是

而與季子國季子猶不受也請無與子而與弟弟兄迭為君而致國乎季子皆曰諾故諸為君者皆輕死為勇飲食必祝曰天苟有吳國尚速有悔於子身故謁也死餘祭也立餘祭也死夷昧也立夷昧也死則國宜之季子者也季子使而亡焉僚者長庶也即之季子使而反至而君之爾闔廬曰先君之所以不與子國而與弟者凡為季子故也將從先君之命與則國宜之季子者也如不從先君之命與則我宜立者也僚惡得為君乎於是使專諸刺僚而致國乎季子季子不受曰爾弑吾君吾受爾國是吾與爾為篡也爾弑吾兄吾又殺爾是父子兄弟相殺終身無已也去之延陵終身不入吳國故君子以其不受為義以其不殺為仁賢季子則吳何以有君有大夫以季子為臣則宜有君者也札者何吳季子之名也春秋賢者不名此何以名許夷狄者不壹而足也季子者所賢也曷為不足乎季子許人臣者必使臣許人子者必使子也穀梁傳吳其稱子何也善使延

陵季子故進之也身賢賢也使賢亦賢也延陵季子之賢尊君也其名成尊於上也杜氏曰餘祭既遣札聘上國而後弑札以六月到魯未聞喪也

札者吳之公子何以不稱公子貶之也辭國而生亂

者

或問季札胡文定公言其辭國以生亂溫公又其明君臣之大分朱子曰可以受可以無受

札

為之也故因其來聘而貶之示法焉

常山劉氏曰札何以不稱公子

辭國而生亂者札為之也吳子壽夢有四子季則札也壽夢欲立札札辭而去過緣先君之志約以次必致國於札夷昧之卒札宜受命以安社稷而徇匹夫之節辭位以逃夷昧之子僚於是代立過之子光乃弑僚而代之是以吳之亂札實為之也故春秋因札來聘去其公子以示貶焉
按吳子壽夢

有子四人長曰諸樊次日餘祭次日夷末札其季子也壽夢賢季札欲立以為嗣札辭不可然後立諸樊諸樊既除喪則致國於季子季子又辭而去之諸樊乃舍其子而立弟約以次傳必及季子故諸樊卒而餘祭立餘祭卒而夷末立夷末卒則季子宜受命以安社稷成父兄之志矣乃徇匹夫之介節辭位以逃夷末之子僚僚既立諸樊之子光曰先君所以不與子國而與弟者凡為季子爾將從先君之命歟則季

子宜有國也如不從先君之命則我宜立僚烏得為君於是使專諸刺僚而致國乎季子季子不受去之延陵終身不入吳國故曰季子辭國以生亂因其來聘而貶之示法焉或謂子貢問於孔子曰伯夷叔齊何人也曰古之賢人也怨乎曰求仁而得仁又何怨子貢以先聖賢夷齊知其惡謂輒之爭而不為也季子辭位獨不為賢而奚貶乎曰叔齊之德不越伯夷孤竹舍長而立幼私意也諸樊兄弟父子無及季札

之賢者其父兄所為眷眷而欲立札公心也以其私
意故夷齊讓國為得仁而先聖之所賢以其公心故
季子辭位為生亂而春秋之所貶苟比而同之過矣
或曰世衰道微暴行交作臣篡其君者有之子篡其
父者有之季子於是焉而辭位則將使聞其風者貪
夫廉爭夫讓而篡弑奪攘之禍損矣其於名教豈不
有補何貶之深也曰春秋達節而不守者也昔大伯
奔吳而不反季歷嗣位而不辭

史記周本紀大王三子長大伯次虞仲少

子季歷季歷生昌有聖瑞大伯知大王欲立季歷以
傳昌乃與虞仲亡如荊蠻以讓季歷鄭子美曰大伯
讓而王季立此季札之家法也札當成其諸兄効武
始祖之讓而已自附於季歷以受國則吳亂弭矣武
王繼統受命作周亦不以配天之業讓伯邑考官天
下也彼王僚無季歷之賢武王之聖而季子為大伯
之讓豈至德乎使爭弑禍興覆師喪國其誰階之也
若季子之辭位守節立名全身自牧則可矣概諸聖
王之道則過矣中庸曰道之不明不行也我知之矣
季子所謂賢且智過而不得其中者也使由於季歷

武王之義其肯附子臧之節而不受乎惜其擇乎中
庸失時措之宜爾此仲尼所以因其辭國生亂而貶
之也或曰吳子使札與楚子使椒秦伯使術一例爾
吳楚蠻夷之國秦介戎狄之間其禮未同於中夏故
使人之來皆畧之而札何以獨為貶乎曰春秋多變
例聖筆有特書荆楚無大夫而屈完書族王朝下士
以人通而子突書字諸侯公子以名著而季友書子
母弟之無列者不登其姓名而叔肸書氏皆賢而特

書者也季札讓國天下賢之若仲尼亦賢季札必依此例或以字或以氏或以公子特書之矣今乃畧以名紀比於楚椒秦術之流無異稱焉是知仲尼不以其讓國為賢而貶之也噫世之君子盛稱季札之賢於讓國之際以為禮之大節不可亂也公子喜時春秋猶賢其後世

見公羊傳昭公二十年喜時即子臧

於季札則何獨貶

之深也曰仲尼於季子望之深矣責之備矣惟與天地同德而達乎時中然後能與於此非聖人莫能修

之豈不信夫

問先儒謂札讓位以名亂貶不稱公子然秦伯使術楚子使椒亦畧之說者以

三者皆蠻裔其禮未同於中夏是以於其使人之來畧其官與族此說當否茅堂胡氏曰春秋有變例有特書謂三者皆蠻裔故畧之是以死法觀春秋而不見聖人之用者也春秋史外傳心之書當以活法觀之默識心通會於言意之表斯得之矣或問大伯讓位適吳聖人以至德稱之季子辭位守節春秋以名責之何也曰大伯時中季子過中自衆人觀之過者為賢自道觀之過猶不及故褒貶如此或曰季子之節而見貶後之權廢立者將有奸名犯分託於賢否之說以濟其私欲而天下亂矣季子之處心積慮其在天下後世非計宗國之私一時之事也曰後之權廢立者如有壽夢之命諸樊餘祭夷末之勤勤於致國公子僚之不肖而季札之賢則非奸名犯分合於天下一國之公心矣不然苟欲濟其私欲是特篡弒

攘奪之倫春秋之所誅而不以聽者也奚有賢否之說而可託哉張氏曰辭讓之心人皆有之至於義之所當受分之所當處而不得辭雖聖人不敢徇小節而以退讓為安舜禹之受天下季歷武王之受國皆擇乎時中當其可而居之者也季子者其父命之其兄讓之受之則父兄之意慊而國家安榮不受則父兄之命塞而適以長亂君子于此將何處而可哉況身為貴戚古之聖賢未有視社稷之安危若是忍者微子箕子比干之在商反覆詔告自靖自獻以求無愧於先王孔子曰殷有三仁焉蓋必若是而後心德始全而吾可以有辭於永世矣季子為其父之所立其兄之所屬違父兄之命而徒以潔身而去為高觀宗國之危難僚與光之相殘賊若秦人視越人之肥瘠正夫子所謂果哉末之難矣者其復位而待之言曰非我生亂君子殆未之信也劉質夫之言得聖人之旨矣汪氏曰公穀為春秋賢季札然書法無異於

闕越椒西乞術則非賢之之辭劉氏胡氏張氏謂春秋貶之非以聖人待之不如椒術也特以稱名而不稱族不稱氏不稱字曾不殊於椒術比於賢者之異稱則為貶爾聖人之意若曰季子有讓國之賢而未合於中庸春秋苟特筆而褒之則人將爭為過高之行而不能與於時中之權也或者謂季子辭國於三十年之後春秋不當貶之於三十年之前今考壽夢已欲立季子諸樊之除喪又致國乎季子則季子之讓不待三十年之後使札為季歷則吳亂弭矣襄二十五年諸樊卒而餘祭立是年餘祭弒而夷末立則季札銜命來聘之時三兄皆讓國不從而迭立矣僚光之亂雖在三十年之後而致亂之由則在三十年之前也責備賢者之法安得不於其來聘而示意哉廬陵李氏曰札其稱公子杜氏以為其禮未同於中國公羊以為許夷狄者不一而足穀梁以為成尊於上而陳氏又以為楚秦之使皆以再至而後進之今

吳一聘而遂同於楚椒秦術之例者吳驟強也書札如椒術者皆非命大夫之詞也其說不一獨常山劉質夫以為貶詞而胡氏張氏皆從之胡氏辨難已精無復他論光祿僚在昭二十七年

秋九月葬衛獻公

齊高止出奔北燕

北燕始見經左傳秋九月齊公孫蠆公孫竈放其大夫高止於北燕乙未出書曰出奔罪高止也高止好以事自為功且專故難及之穀梁傳其曰北燕從史文也襄陵許氏曰君放大夫可也臣放大夫是無君也不可以訓故以出奔書也杜氏曰止高厚之子北燕燕國薊縣張氏曰北燕姬姓名公奭之後

冬仲叔羯如晉

左傳冬孟孝伯
如晉報范叔也

附錄

左傳為高氏之難故高豎以盧叛十月庚寅閭丘嬰帥師圍盧高豎曰苟使高氏有後請致邑

齊人立敬仲之曾孫鄰良敬仲也十一月乙卯高豎致盧而出奔晉晉人城綿而寘旃○鄭伯有使公孫黑如楚辭曰楚鄭方惡而使余往是殺余也伯有曰世行也子皙曰可則往難則已何世之有伯有將強使之子皙怒將伐伯有氏大夫和之十二月己巳鄭大夫盟於伯有氏禪諶曰是盟也其與幾何詩曰君子屢盟亂是用長今是長亂之道也禍未歇也必三年而後能紓然明曰政將焉往禪諶曰善之代不善天命也其焉辟子產舉不踰等則位班也擇善而舉則世隆也天又除之奪伯有魄子西即世將焉辟之天禍鄭久矣其必使子產息之乃猶可以戾不然將亡矣

戊景王

三十年

晉平十五齊景五衛襄公惡元年蔡景

午二年

四十九

弑鄭簡

二十三

曹武十二

陳哀

二十六杞文七宋平三十三秦景
三十四楚郊敖二吳夷末元年

春王正月楚子使薳罷來聘

左傳通嗣君也穆叔問王子之為政何如對曰吾儕小
人食而聽事猶懼不給命而不免於戾焉與知政固問
焉不告穆叔告大夫曰楚令尹將有大事子蕩將與焉
助之匿其情矣余氏曰且報朝也張氏曰魯以君行而
楚以大夫聘此齊桓晉文所以行乎列國者故自宋之
盟中外不辨楚人行霸王之禮於中國非晉平趙武之
責而何哉高氏曰公踰年在楚楚郊敖新即位故使薳
罷來聘以報之自文公九年至此歷七十餘年未嘗來
聘今薳罷之來蓋為恭也自是吳楚皆不復來聘矣王
氏曰楚至此君臣之詞與中國無異者荆蠻盛強中國

諸侯服役不暇矣廬陵李氏曰楚聘魯者三至此書法始同於中國

附錄

左傳子產相鄭伯以如晉叔向問鄭國之政焉對曰吾得見與否在此歲也駟良方爭未知所

成若有所成吾得見乃可知也叔向曰不既和矣乎對曰伯有侈而愎子皙好在上莫能相下也雖其和也猶相積惡也惡至無日矣○三月癸未晉悼夫人食與人之城杞者絳縣人或年長矣無子而往與於食有與疑年使之年曰臣小人也不知紀年臣生之歲正月甲子朔四百有四十五甲子矣其季於今三之一也史克問諸朝師曠曰魯叔仲惠伯會卻成子于承國之歲也是歲也狄伐魯叔孫莊叔於是乎敗狄于鹹獲長狄僑如及虺也豹也而皆以名其子七十三年矣史趙曰亥有二首六身下二如身是其日數也士文伯曰然則二萬六千六百有六旬也趙孟問其縣大夫則其屬也召之而謝過焉曰武不才

任君之大事以晉國之多虞不能由吾子使吾子辱在泥途久矣武之罪也敗謝不才遂仕之使助為政辭以老與之田使為君復陶以為絳縣師而廢其與尉於是魯使者晉歸以語諸大夫季武子曰晉未可喻也有趙孟以為大夫有伯瑕以為佐有史趙師曠而咨度焉有叔向女齊以師保其君其朝多君子其庸可喻乎勉事之而後可○夏四月己亥鄭伯及其大夫盟君子是以知鄭難之不已也

夏四月蔡世子般弑其君固

左傳蔡景侯為太子般娶于楚通焉太子弑景侯家氏曰般之慈景之禍其積習有自來矣人莫不有義理之心所謂義理之心夫人之所同也蔡與陳鄭本皆諸侯之與國中間為楚所迫去來無常惟蔡自厥貉之會甘

於從楚去而不復者七十有餘年染於商臣之俗積習
蓋有自来也○劉氏曰向若書日者可遂云非奪父政
乎又何云非外之
乎穀梁之說非也

五月甲午宋災宋伯姬卒

左傳或叫于宋大廟曰譖譖出出鳥鳴于亳社如曰譖
譖甲午宋大災宋伯姬卒待姆也君子謂宋共姬女而
不婦女待人婦義事也穀梁傳取卒之日加之災上者
見以災卒也其見以災卒奈何伯姬之舍失火左右曰
夫人少辟火乎伯姬曰婦人之義傳姆不在宵不下堂
左右又曰夫人少辟火乎伯姬曰婦人之義傳姆不在
宵不下堂遂逮乎火而死婦人以貞為行
者也伯姬之婦道盡矣詳其事賢伯姬也

穀梁子曰取卒之日加之災上者見以災卒也伯姬

之舍失火左右曰夫人少避火乎曰婦人之義傳姆

不在

姆音茂王氏曰女師也

宵不下堂遂逮乎火而死婦人以

貞為行者也伯姬之婦道盡矣詳其事賢伯姬也易

曰恒其德貞婦人吉夫子凶

程子曰以順從為恒者婦入之道在婦人則為

貞故吉若丈夫而以順從於人為恒則失其剛陽之正乃凶也

而或以為共姬女而

不婦非也世衰道微暴行交作女德不貞婦道不明

能全其節守死不回見於春秋者宋伯姬耳聖人冠

以夫諡書於春秋曰葬宋公姬以著其賢行勵天下

之婦道也

安定胡氏曰伯姬乃婦人中之伯夷也襄陵許氏曰王化始於正家春秋撥亂謹禮

以宋共姬為婦道之表故詳錄焉劉氏曰使共姬避火而全生未足以害其貞也然而不以己之可以全其生之故而違天下之常義此安乎性命者乃能之故審乎生死之度辨乎榮辱之境知禮之重重於生辱之甚甚於死伯夷叔齊餓于首陽之下求仁得仁何以過乎左氏曰共姬女而不婦女待人婦義事也非也如共姬之守禮死義不求生以害仁亦可免矣反謂之不婦乎易曰恒其德貞婦人吉共姬恒之矣所謂婦也臨川吳氏曰蓋亦罪宋之子與臣不能救其君母使之逮乎火而死也汪氏曰伯姬以成九年歸于宋共公成十五年共公卒婺居三十有四年其年蓋六十矣大延其宮必待傅姆而後避固守婦節以及於死或者云傅姆宵出必有常處伯姬守常而不知變必逮于火以是為賢則嫂溺援之以手者非

也竊謂援溺之權乃丈夫變禮以救他人之死婦人越禮以貪生而免己之死則非義矣伯姬年邁六十雖曰避火全生未害其貞然君子之道過乎厚小人之道過乎薄春秋賢伯姬所以著其秉節不愉庶幾風勵千古使夫不當避而避以失節於造次顛沛之際者知所警也宣曰小補之哉

天王殺其弟佞夫

左傳初王儋季卒其子括將見王而歎單公子愆期為靈王御士過諸廷聞其歎而言曰嗚呼必有此夫入以告王且曰必殺之不感而願大視蹠而足高心在他矣不殺必害王曰童子何知及靈王崩儋括欲立王子佞夫佞夫弗知戊子儋括圍蒺藜遂成愆成愆奔平時五月癸巳尹言多劉穀單蔑甘過鞏成殺佞夫括瑕廖奔晉書曰天王殺其弟佞夫罪在王也穀梁傳傳曰諸侯且不首惡況於天子乎君無忍親之義天子諸侯所親者

唯長子母弟耳天王殺其弟佞夫甚之也孫氏曰春秋之義天子無專殺故二百四十年無天王殺大夫文此言殺其弟佞夫者景王不能容一母弟不可不見也呂氏曰言殺其弟無親親之恩也張氏曰王者之道親親而及天下則治有序別嫌疑以明賞罰則政有經周景王初立僭括謀亂而免佞夫不知而死所厚者薄本心亡矣所以終欲黜嫡立庶而致子朝之亂也臨川吳氏曰象欲殺舜而舜封之為諸侯仁人之於弟益如此僭括為亂佞夫實不知謀而尹劉諸人乃殺佞夫書王殺者罪王不能免其弟也陳氏曰凡王殺不書雖王子不書甚者母弟亦不書必殺無罪也而後書

王子瑕奔晉

臨川吳氏曰瑕天王之子蓋亦與聞乎僭括之謀括事敗而佞夫見殺瑕懼及禍而奔晉瑕不能明為子事父

之孝而自比於逆亂之黨蓋逆子也奔以逃死而自絕於父有罪而奔不可復入與王子朝奔楚同故不言出汪氏曰瑕朝皆為逆亂無所容身避罪逃竄非居祿位而出奔如國滅之君與在外之臣故不言出而止言奔附錄左傳六月鄭子產如陳涖盟歸復命告大夫曰陳亡國也不可與也聚禾粟繕城郭恃此二者而不撫其民其君弱植公子侈太子卑大夫教政多門以介於大國能無亡乎不過十年矣

秋七月叔弓如宋葬宋共姬

公羊傳外夫人不書葬此何以書隱之也何隱耳宋災伯姬卒焉其稱諡何賢也何賢爾宋災伯姬存焉有司復曰火至矣請出伯姬曰不可吾聞之也婦人夜出不見傅姆不下堂傳至矣母未至也逮乎火而死穀梁傳外夫人不書葬此其言葬何也吾女也卒災故隱而葬之也杜氏曰共姬從夫諡也叔弓叔老之子卿共葬事

禮過厚陸氏曰為災而死高其志行使卿往會所以書之薛氏曰古者夫人無諡從夫之諡東遷之後其制曠矣共姬執禮而死宋人不敢加非禮之諡一人守正知天下莫之違矣

鄭良霄出奔許自許入于鄭鄭人殺良霄

左傳鄭伯有者酒為窟室而夜飲酒擊鐘焉朝至未已朝者曰公焉在其人曰吾公在壑谷皆自朝布路而罷既而朝則又將使子皙如楚歸而飲酒庚子子皙以駟氏之甲伐而焚之伯有奔雍梁醒而後知之遂奔許大夫聚謀子皮曰仲虺之志云亂者取之亡者侮之推亡固存國之利也罕駟靈同生伯有汰侈故不免人謂子產就直助疆子產曰豈為我徒國之禍難誰知所敝或主疆直難乃不生姑成吾所辛丑子產斂伯有氏之死者而殯之不及謀而遂行印段從之子皮止之衆曰人不我順何止焉子皮曰夫子禮於死者況生者乎遂自

止之壬寅子產入癸卯子石入皆受盟于子皙氏乙巳鄭伯及其大夫盟于大宮盟國人于師之梁之外伯有聞鄭人之盟已也怒聞子皮之甲不與攻已也喜曰子皮與我矣癸丑晨自墓門之潰入因馬師頡介于襄庫以伐舊北門駟帶帥國人以伐之皆召子產子產曰兄弟而及此吾從天所與伯有死於羊肆子產槨之枕之股而哭之斂而殯諸伯有之臣在市側者既而葬諸斗城子駟氏欲攻子產子皮怒之曰禮國之幹也殺有禮禍莫大焉乃止於是游吉如晉還聞難不入復命于介八月甲子奔晉駟帶追之及酸棗與子上盟用兩珪質于河使公孫盱入盟大夫已已復歸書曰鄭人殺良霄不稱大夫言自外入也於子蟠之卒也將葬公孫揮與裨竈晨會事焉過伯有氏其門上生莠子羽曰其莠猶在乎於是歲在降婁降婁中而且裨竈指之曰猶可以終歲歲不及此次也已及其亡也歲在姬訾之口其明年乃及降婁僕展從伯有與之皆死羽頡出奔晉為任

大夫雞澤之會鄭樂成奔楚遂適晉羽頡因之與之比而事趙文子言伐鄭之說焉以宋之盟故不可子皮以公孫鉏為馬師穀梁傳不言大夫惡之也

按左氏良霄汰侈嗜酒諸大夫皆惡之而與公孫黑爭黑因其醉伐之良霄奔許自許襲鄭以伐公門弗勝死于羊肆不言復入者其位未絕也若宋魚石晉欒盈去國三年其稱復入位已絕矣不言叛者將以滅國非直叛也若華亥之入南里宋辰之入蕭其書叛者皆據土背君以自保未有滅國之謀也不言殺

其大夫者非其大夫矣討賊之詞也

張氏曰良霄之出公孫黑蓋有

罪焉春秋舍黑專伐之罪而罪良霄何也伯有之所為有喪家亡身之道焉雖微公孫黑其能免於死乎既亡而不自省又入伐君而大亂其國此春秋所以正名以討賊之辭也春秋於喪國失家者皆不書所逐之人以明其身之有罪使有國有家者兢兢自謹而求所以反身自修之道則奔亡之禍遠矣

冬十月葬蔡景公

公羊傳賊未討何以書葬君子辭也穀梁傳不日卒而月葬不葬者也卒而葬之不忍使父失民於子也○劉氏曰凡不書葬者豈失民之謂乎穀梁之說非也汪氏曰公羊云君子辭也說者以為穀父恥重為中國諱夫既明書世子穀君又曰諱之可乎

附錄

左傳楚公子圍殺大司馬為掩而取其室申無

宇曰王子必不免善人國之主也王子相楚國

將善是封殖而虐之是禍國也且司馬令尹之偏而

王之四體也絕民之主去身之偏父王之體以禍其

國無不祥大

也何以得免

晉人齊人宋人衛人鄭人莒人邾人滕人薛人杞

人小邾人會于澶淵宋災故

左傳為宋災故諸侯之大夫會以謀歸宋財冬十月叔

孫豹會晉趙武齊公孫蠆宋向戌衛北宮佗鄭罕虎及

小邾之大夫會于澶淵既而無歸於宋故不書其人君

子曰信其不可不慎乎澶淵之會卿不書不信也夫諸

侯之上卿會而不信寵名皆棄不信之不可也如是詩

曰文王陟降在帝左右信之謂也又曰淑慎爾止無載

爾僞不信之謂也書曰某人某人會于澶淵宋災故尤之也不書魯大夫諱之也公羊傳宋災故者何也諸侯會于澶淵凡為宋災故也會未有言其所為者此言所為何錄伯姬也諸侯相聚而更宋之所喪曰死者不可復生爾財復矣此大事也曷為使微者卿也卿則其稱人何貶曷為貶卿不得憂諸侯也穀梁傳會不言其所為其曰宋災故何也不言災故則無以見其善也其曰人何也救災以衆何救焉更宋之所喪財也澶淵之會中國不侵伐夷狄夷狄不入中國無侵伐八年善之也晉趙武楚屈建之力也程子曰左氏傳叔孫豹會晉趙武而下諸國之卿既貶魯卿諱而不書

春秋大法君弑而賊不討則不書葬况世子之於君乎蔡景公何以獨書葬遍刺天下之諸侯也葬送之

禮在春秋時視人情之疎密而為之者也有

嘗同盟卒而不赴者

汪氏曰蔡莊公甲午于齊于薄踐土翟泉四同

盟文十五年卒不書

有雖同姓赴而不會者

汪氏曰莊二十五年

衛惠公卒宣九年衛成公卒僖九年晉獻公卒二十四年晉惠公卒十四年蔡穆公卒三

十二年鄭文公卒成六年鄭悼公卒襄二年鄭成公卒隱七宣九成十六年三書滕君卒

皆不葬則以哀死而致祔為輕弔生而歸賻為

重必矣今蔡世子般弑其君藏在諸侯之策

而往會其葬是恩義情禮之篤於世子般不

以為賊而討之也。豈不廢人倫滅天理乎？故春秋大法君弑賊不討則不書而葬。蔡景公特書葬者，聖人深痛其所為，遍刺天下之諸侯也。魯隱宗殤之賊不討則不書葬。蔡景公賊亦不討而特書葬，猶閔僖二公不承國于先君，則不書即位，桓宣篡弑以立而反書之也。

汪氏曰：春秋君弑賊不討而書葬者，為蔡景公許悼公皆世子弑君，然許止但不嘗藥，非真弑君者，故特書葬以滅其罪。蔡般罪大惡極而諸侯不討，故春秋書葬且貶會澶淵之大夫。

而書宋災故所以深著其不能討賊也何以知聖人罪諸侯之意如此

乎以下文書會于澶淵宋災故而貶其大夫則知之

矣朱子曰程子所謂春秋大義數十如成宋亂宋災故之類乃是聖人直著誅貶李氏集義曰書宋災

故起大夫為會之意亦猶桓三年書以成宋亂二百四十二年之間列會亦

衆而未有言其所為者此獨言其所為何遍刺天下

之大夫也劉氏曰會未有言其所為者此其言所為何晉人與諸侯十二國之大夫會于澶淵

凡為宋災故謀之也曰更宋之所喪雖死者不可復生其財復矣非務也何言乎非務蔡侯弑其君而不謀宋災而謀之微矣夫災雖諸侯所當救然而一時之變一國之禍也財足以周其乏粟足以濟其用則

已矣非所以為天下之憂也被天下之憂者臣弑君子弑父如是則大亂矣雖有粟吾得而食諸故孔子論天下之信則曰寧去食論陳恒之變則曰請討之其察於道之輕重緩急大小先後也審矣豈以姑息愛人哉

大夫以智帥人者也智者無不知當務之為急不能三年之喪而總小功之察放飯流啜而問無齒決是之謂不知務蔡世子般弑其君天下之大變天理所不容也則會其葬而不討宋國有災小事也則合十二國之大夫更宋之所喪而歸其財則可謂知務乎陳恒弑簡公孔子沐浴而朝告於哀公請討之

公曰告夫三子者子曰以吾從大夫之後不敢不告也之三子告不可子曰以吾從大夫之後不敢不告也叔孫豹晉趙武而下皆諸侯上卿執國之政者也三綱國政之大至於淪絕無父與君是禽獸也禽獸逼人雖得天下弗能一朝處矣昔者伯禹過門而不入放龍蛇也周公坐而俟旦驅猛獸也今世子弑君三綱淪絕禽獸逼人則與之同羣而不恤有國者不戒于火自亡其財苟其來告弔之可也則合十二國

之大夫駐于澶淵而謀更其所喪尚為知類也乎夫
蔡之亂其猶人身有腹心之疾而宋之災譬諸桐梓
與雞犬也謀宋災而不恤蔡之亂奚啻於養桐梓求
雞犬不顧其身有腹心危疾而不知療者哉以為未
之察也可謂不智苟察此而不謀則亦不仁矣是故
諸國之大夫貶而稱人魯卿諱而不書又特言會之
所為以垂戒後世其欲人之自別於禽獸之害也可
謂深切著明矣或曰夫穆叔趙孟向戌子皮皆諸侯

之良也而所謀若是何也世衰道微邪說交作以利
害謀國家而不知本於仁義也久矣是以至此極孔

子所為懼春秋所以作乎

○劉氏曰左氏云謀歸宋財既而無歸故不書其人

非也失信者如清丘之盟直貶其人而已矣今獨舉其事又貶其人非特惡失信而已也公羊云此大事曷為使微者卿也其稱人卿不得憂諸侯也亦非也諸侯相聚而更宋之所喪何大事之有大夫受君命以出是諸侯耳何用必其非諸侯之命乎穀梁云善之也其曰人何也救災以衆亦非也一國失火自焚其財小事耳諸侯至羣聚而謀之乎以此為善是春秋貴小惠而不貴道也且宋以五月失火諸侯以冬會澶淵是可謂救災乎廬陵李氏曰此條穀梁以為善之書人者衆詞固失之矣而左氏止非其不信公羊

又謂卿不得憂諸侯夫春秋盟會之不信者多矣城
杞卿之憂諸侯也何獨于此而貶之深乎故胡氏獨
從劉贊夫之言而張氏亦用之其義精矣

附錄

左傳鄭子皮授子產政辭曰國小而偏族大寵
多不可為也子皮曰虎帥以聽誰敢犯子子善

相之國無小小能事大國乃寬子產為政有事伯石
賂與之邑子太叔曰國皆其國也奚獨賂焉子產曰
無欲實難皆得其欲以從其事而要其成非我有成
其在人乎何愛於邑邑將焉往子太叔曰若四國何
子產曰非相違也而相從也四國何尤焉鄭書有之
曰安定國家必大馬先姑先安大以待其所歸既伯
石懼而歸邑卒與之伯有既死使太史命伯石為卿
辭太史退則請命焉復命之又辭如是三乃受策八
拜子產是以惡其為人也使次已位子產使都鄙有
章上下有服田有封洫廬井有伍大人之忠倫者從

而與之泰侈者因而斃之豐卷將祭請田焉弗許曰
唯君用鮮衆給而已子張怒退而徵役子產奔晉子
皮止之而逐豐卷豐卷奔晉子產請其田里三年而
復之反其田里及其入焉從政一年與人誦之曰取
我衣冠而櫜之取我田疇而伍之孰殺子產吾其與
之及三年又誦之曰我有子弟子產誨之我有田疇
子產殖之子產而死誰其嗣之

己景王
未三年

三十有一年

晉平十六齊景六衛襄二蔡靈公
般元年鄭簡二十四曹武十三陳

哀二十七杞文八宋平三十四秦
景三十五楚郢敖三吳夷末二

春王正月

附錄

左傳春王正月穆叔至自會見孟孝伯語之曰
趙孟將死矣其語偷不似民主且年未盈五十

而諄諄焉如八九十者弗能久矣若趙孟死為政者其韓子乎吾子盍與季孫言之可以樹善君子也晉君將失政矣若不樹焉使早備魯既而政在大夫韓子懦弱大夫多貪求欲無厭齊楚未足與也魯其懼哉孝伯曰人生幾何誰能無偷朝不及夕將安用樹穆叔出而告人曰孟孫將死矣吾語諸趙孟之偷也而又甚焉又與季孫語晉故季孫不從及趙文子卒晉公室卑政在侈家韓宣子為政不能圖諸侯魯不堪晉求讒慝弘多是以有平丘之會○齊子尾害閭丘嬰欲殺之使帥師以伐陽州我問師故夏五月子尾殺閭丘嬰以說于我師工偃灑消竈孔旭賈寅出奔莒出羣公子

夏六月辛巳公薨于楚宮

左傳公作楚宮穆叔曰太誓云民之所欲天必從之君欲楚也夫故作其宮若不復適楚必死是宮也六月辛

已公薨于楚宮叔仲帶竊其拱璧以與御人納諸其懷而從取之由是得罪穀梁傳楚宮非正也杜氏曰公適楚好其宮歸而作之不居先君之路寢而安所樂失其所也薛氏曰楚宮別宮也小寢猶非正也况別宮乎襄陵許氏曰公還自楚不能增修德政而反勤民傷財務作楚宮公之志亦荒矣其何政之有又况變夏從夷亂國經常所以為不祥之道也廬陵李氏曰襄公在位三十一年當其初立外則晉悼之伯方務綏睦親隣內則季孫行父仲孫蔑叔孫豹皆賢大夫故魯國自事伯外曾無他虞奈何自五年季文子卒後武子繼之專權肆欲城費而私邑張作三軍而公室卑入鄆而君命不行於楚諸大夫則而象之城成郭而孟氏強矣城防而臧氏亦強矣悼公既沒齊邦交伐魯之不振益甚蓋以兵權分于三家故也至其末年乃俯首南面而朝於楚雖晉伯之失使然而魯之人望亦泯矣孔子曰祿之去公室五世矣政逮于大夫四世矣蓋宣成以來已然而實

成于襄公也季氏曰仲孫之用事者五叔孫之用事者有四季孫之用事者十則三卿專政之形成齊人伐我者七邢人伐我者二莒人侵我者四則隣國交爭之禍起雖享國長久倚晉為重已階削弱之端此襄公生亂而不悟其變也斯言得之矣

秋九月癸巳子野卒

左傳立胡女敬歸之子子野次于季氏秋九月癸巳卒毀也立敬歸之娣齊歸之子公子稠穆叔不欲曰太子死有母弟則立之無則立長年均擇賢義鉤則卜古之道也非適嗣何必娣之子且是人也居喪而不哀在感而有嘉容是謂不度不度之人鮮不為患若果立之必為季氏憂武子不聽卒立之比及葬三易衰衰衽如故衰于是昭公十九年矣猶有童心君子是以知其不能終也穀梁傳子卒日正也

子般子赤弑而書卒子野過毀亦書卒何以別乎曰
閔公內無所承不書即位則子般之弑可知下書夫
人姜氏歸于齊上書公子遂叔孫得臣如齊亦之卒
也隱而不日則子赤之弑可知與子野異矣子野有
命立昭公故穆叔雖不欲而不能止也孫氏曰子野
襄公太子未
逾年之君也名未葬也不薨不地降成君也杜氏曰
不書葬未成君汪氏曰居喪毀瘠不形者先王之禮
也毀不滅性者先王之教也故不勝喪者比於
不慈不孝野過哀毀瘠以致滅性亦不子矣

己亥仲孫羯卒

左傳已亥孟孝伯卒王氏曰
子獲嗣為大夫是為僖子

冬十月滕子來會葬

諸侯始親來會葬左傳滕成公來會葬情而多涕子服
惠伯曰滕君將死矣急於其位而哀已甚兆於死所矣
能無從乎襄陵許氏曰先王之制諸侯之喪士弔大夫
送葬滕子會葬非禮也陳氏曰改葬惠公也衛侯來會
葬隱公不見春秋之初魯猶秉禮也晉景公之喪成公
弔焉亦已卑矣晉於是止公使送葬諸侯莫在魯人辱
之雖伯主未有君會葬者也葬楚康王也公及陳侯鄭
伯許男送於西門之外則天下諸侯有會葬于楚者矣
於是滕子會葬於魯是春秋之季也會葬猶可奔喪甚
矣家氏曰魯君未嘗會天王之葬而滕君來會魯葬滕
之來魯之
受皆貶也

癸酉葬我君襄公

附錄

左傳公薨之月子產相鄭伯以如晉晉侯以我喪故未之見也子產使盡壞其館之垣而納車

馬焉士文伯讓之曰敝邑以政刑之不修寇盜充斥無若諸侯之屬辱在寡君者何是以令吏人完客所館高其閭閥厚其牆垣以無憂客使今吾子壞之雖從者能戒其若異客何以敝邑之為盟主繕完葺牆以待賓客若皆毀之其何以共命寡君使句請命對曰以敝邑褊小介於大國誅求無時是以不敢寧居恚索敝賦以來會時事逢執事之不問而未得見又不獲聞命未知見時不敢輸幣亦不敢暴露其輸之則君之府實也非薦陳之不敢輸也其暴露之則恐燥濕之不時而朽蠹以重敝邑之罪僑聞文公之為盟主也宮室卑庠無觀臺榭以崇大諸侯之館館如公寢庫廡繕修司空以時平易道路圻人以時塙館

宮室諸侯賓至甸設庭燎僕人巡宮車馬有所賓從
有代巾車脂轄隸人牧圉各瞻其事百官之屬各展
其物公不留賓而亦無廢事憂樂同之事則巡之教
其不知而恤其不足賓至如歸無寧菑患不畏寇盜
而亦不患燥濕今銅鞮之宮數里而諸侯舍於隸人
門不容車而不可踰越盜賊公行而天癘不戒賓見
無時命不可知若又勿壞是無所藏幣以重罪也敢
請執事將何所命之雖君之有魯喪亦敝邑之憂也
若獲薦幣修垣而行君之惠也敢憚勤勞文伯復命
趙文子曰信我實不德而以隸人之垣以贏諸侯是
吾罪也使士文伯謝不敏焉晉侯見鄭伯有加禮厚
其宴好而歸之乃築諸侯之館叔向曰辭之不可以
已也如是夫子產有辭諸侯賴之若之何其釋辭也
詩曰辭之輯矣民之協矣辭之懌矣民之莫矣其知
之矣鄭子皮使印段
如楚以適晉告禮也

十有一月莒人弑其君密州

左傳莒犁比公生去疾及展與既立展與又廢之犁比公虐國人患之十一月展與因國人以攻莒子弑之乃立去疾奔齊齊出也展與吳出也書曰莒人弑其君買朱鉏言罪之在也程子曰莒子虐國人弑之而立展與展與非親弑也故書國人也

經以傳為案傳有乖繆則信經而棄傳可也

程子曰春秋傳

為案經為斷以傳考經之事迹以經別傳之真偽

若密州之事是矣左氏稱

莒子生去疾及展與既立展與又廢之莒子虐國人患焉展與因國人以攻莒子弑之乃立信斯言則子

弑其父也而春秋有不書乎故趙匡謂其文當曰展
與因國人之攻莒子弑之乃立而後來傳寫誤為以
字爾左氏博通諸史叙事尤詳能令後人得見本末
因以求意經文可知而門弟子轉相傳受日月既久
浸失本真如書晉趙盾許世子止等事詳考傳之所
載以求經之大義可也而傳不可疑如莒人弑其君
密州獨依經之所言以證傳之謬誤可也而傳不可
信

或問左氏可信否程子曰盡以為可疑而廢傳則不可全信信其可信者耳

無以知其事之本末盡以為可信而任傳則經之弘意大旨或泥而不通矣要在學者詳攷而精擇之可

也

家氏曰左氏云書莒人之弑其君言罪之在也置其子之大惡歸過於其父春秋必不然蓋犂比公

虐國人作亂而弑之展與既廢於父而見立於國人使展與能討賊於既立之後庶乎可免矣

附錄

左傳吳子使屈狐庸聘于晉通路也趙文子問焉曰延州來季子其果立乎巢隕諸樊闔戕戴

吳天似啟之何如對曰不立是二王之命也非啟季子也若天所啟其在今嗣君乎甚德而度德不失民度不失事民親而事有序其天所啟也有吳國者必此君之子孫實終之季子守節者也雖有國不立○十二月北宮文子相衛襄公以如楚宋之盟故也過鄭印段廷勞于裴林如聘禮而以勞辭文子入聘子

羽為行人馮簡子與子大叔逆客事畢而出言於衛侯曰鄭有禮其數世之福也其無大國之討乎詩云誰能執熱逝不以濯禮之於政如熱之有濯也濯以救熱何患之有子產之從政也擇能而使之馮簡子能斷大事子大叔美秀而文公孫揮能知四國之為而辨於其大夫之族姓班位貴賤能否而又善為辭令裨諲能謀謀於野則獲謀於邑則否鄭國將有諸侯之事子產乃問四國之為於子羽且使多為辭令與裨諲乘以適野使謀可否而告馮簡子使斷之事成乃授子大叔使行之以應對賓客是以鮮有敗事比宮文子所謂有禮也○鄭人游于鄉校以論執政然明謂子產曰毀鄉校如何子產曰何為夫人朝夕退而游焉以議執政之善否其所善者吾則行之其所惡者吾則改之是吾師也若之何毀之我聞忠善以損怨不聞作威以防怨豈不遽止然猶防川大決所犯傷人必多吾不克救也不如小決使道不如吾

聞而藥之也然明日茂也今而後知吾子之信可事也
也小人實不才若果行此其鄭國實賴之豈唯二三
臣仲尼聞是語也曰以是觀之人謂子產不仁吾不
信也○子皮欲使尹何為邑子產曰少未知可否子
皮曰愿吾愛之不吾叛也使夫往而學焉夫亦愈知
治矣子產曰不可人之愛人求利之也今吾子愛人
則以政猶未能操刀而使割也其傷實多子之愛人
傷之而已其誰敢求愛於子子於鄭國棟也棟折榱
崩僑將厭焉敢不盡言子有美錦不使人學製焉大
官大邑身之所庇也而使學者製焉其為美錦不亦
多乎僑聞學而後入政未聞以政學者也若果行此
必有所害譬如田獵射御貫則能獲禽若未嘗登車
射御則敗績厭覆是懼何暇思獲子皮曰善哉虎不
敏吾聞君子務知大者遠者小人務知小者近者我
小人也衣服附在吾身我知而慎之大官大邑所以
庇身也我遠而慢之微子之言吾不知也他日我曰

子為鄭國我為吾家以庇焉其可也今而後知不足
自今請雖吾家聽子而行子產曰人心之不同如其
面焉吾豈敢謂子面如吾面乎抑心所謂危亦以告
也子皮以為忠故委政焉子產是以能為鄭國○衛
侯在楚北宮文子見令尹圉之威儀言於衛侯曰令
尹似君矣將有他志雖獲其志不能終也詩云靡不
有初鮮克有終終之實難令尹其將不免公曰子何
以知之對曰詩云敬慎威儀惟民之則令尹無威儀
民無則焉民所不則以在民上不可以終公曰善哉
何謂威儀對曰有威而可畏謂之威有儀而可象謂
之儀君有君之威儀其臣畏而愛之則而象之故能
有其國家令聞長世臣有臣之威儀其下畏而愛之
故能守其官職保族宜家順是以下皆如是是以上
下能相固也衛詩曰威儀棣棣不可選也言君臣上
下父子兄弟內外大小皆有威儀也周詩曰朋友攸
攝攝以威儀言朋友之道必相教訓以威儀也周書

數文王之德曰大國畏其力小國懷其德言畏而愛之也詩云不識不知順帝之則言則而象之也紂囚文王七年諸侯皆從之囚紂於是乎懼而歸之可謂愛之文王伐崇再駕而降為臣蠻夷帥服可謂畏之文王之功天下誦而歌舞之可謂則之文王之行至今為法可謂象之有威儀也故君子在位可畏施舍可愛進退可度周旋可則容止可觀作事可法德行可象聲氣可樂動作有文言語有章以臨其下謂之儀也

春秋大全卷二十八